

U ovom broju, između ostalog, čitajte:

- **Na inicijativu UPFBiH izmijenjena i dopunjena Uredba o postupku prijema u radni odnos u javnom sektoru u FBiH**
- **Dom naroda FBiH usvojio Zakon o računovodstvu i reviziji, usvojeno većina primjedbi UPFBiH**
- **UPFBiH se protivi donošenju Zakona o stečaju kojeg je predložila Vlada FBiH**
- **Iz Vlade FBiH ne dostavljaju zakonske prijedloge socijalnim partnerima**
- **UPFBiH i Ministarstvo razvoja, poduzetništva i obrta FBiH o Nacrtu zakona o poticanju razvoja malog gospodarstva**
- **UPFBiH dostavilo predsjedavajućem i klubovima zastupnika ZD PFBIH amandmane na Prijedlog zakona o izmjenama i dopunama Zakona o registraciji poslovnih subjekata**



Na inicijativu UPFBiH izmijenjena i dopunjena Uredba o postupku prijema u radni odnos u javnom sektoru u FBiH

Uvodi se ograničenje prijema u radni odnos na određeno vrijeme do šest mjeseci jednokratno u toku jedne kalendarske godine za određeno radno mjesto, umjesto ranije predviđenog perioda do 120 dana

Nakon višemjesečnih zalaganja predstavnika Udruženja poslodavaca Federacije Bosne i Hercegovine i razmatranja na sjednicama Ekonomsko-socijalnog vijeća za teritoriju FBiH, Federalno ministarstvo rada i socijalne politike konačno je prihvatilo inicijativu Udruženja i Vladi uputilo Prijedlog izmjena i dopuna Uredbe o postupku prijema u radni odnos u javnom sektoru u FBiH, te je Vlada FBiH na sjednici održanoj 28. januara 2021. godine, a na inicijativu i insistiranje Udruženja poslodavaca FBiH izmijenila i dopunila pomenutu uredbu.

Uredba je u primjeni od 28. februara 2019. godine.

Novo rješenje odnosi se na član koji reguliše izuzetke od obaveze javnog oglašavanja kod poslodavaca. Navedenim izmjenama se omogućava:

- Otkaz sa ponudom izmijenjenog ugovora o radu u skladu sa internim aktom poslodavca,
- Prijem radnika u radni odnos na određeno vrijeme bez procedure obaveznog javnog oglašavanja na duži period odnosno do šest mjeseci jednokratno u toku jedne kalendarske godine za konkretno radno mjesto, umjesto ranije predviđenog perioda do 120 dana,

- Odgoda primjene na 12 mjeseci, odnosno omogućava prijem radnika u radni odnos bez provođenja procedura javnog oglašavanja na određeno vrijeme do 12 mjeseci u slučaju proglašenog stanja prirodne nesreće, a sa ciljem da se omogući hitni prijem radnika isključivo u okolnostima proglašenog stanja prirodne nesreće ili druge nesreće u FBiH ili epidemije zarazne bolesti u FBiH, kao i vanrednog stanja kojeg proglaše nadležne institucija.




Udruženje poslodavaca FBiH je prethodno upozoravalo da će ukoliko se Uredba ne uskladi sa članom 107. Zakona o radu FBiH, javna preduzeća i preduzeća sa više od 50 posto državnog kapitala imati veliki problem u njoj provedbi te da je neophodno pronaći

rješenje koje se može primijeniti u praksi, kao što je to urađeno u zemljama regiona i većini zemalja članica Europske unije.

Nakon mnogobrojnih sastanaka i lobiranja od strane Udruženja poslodavaca, konačno su prihvaćeni prijedlozi Udruženja.

Prijedlog uredbe možete pogledati [OVDJE](#).



Dom naroda FBiH usvojio Zakon o računovodstvu i reviziji, usvojeno većina primjedbi UPFBiH

UPFBiH bilo je uključeno u izradu Nacrta, Prijedloga, te ulagalo amandmane insistirajući na kvalitetnim rješenjima


U Federaciji Bosne i Hercegovine donesen je novi Zakon o računovodstvu i reviziji zbog potrebe unapređivanja te oblasti, što je jedan od ciljeva ekonomske politike. U oktobru prošle godine, prijedlog tog zakona je prihvatio Zastupnički dom, a danas je to učinio i Dom naroda Parlamenta FBiH, čime su se stekli uvjeti da Zakon stupi na snagu po objavi u Službenim novinama.

Udruženje poslodavaca FBiH bilo je uključeno u izradu Nacrta, Prijedloga, te je ulagalo amandmane kada je zakon bio na razmatranju u Zastupničkom domu, insistirajući na kvalitetnim rješenjima.

U Zakonu su djelomično usvojeni i amandmani Udruženja poslodavaca FBiH, a koji se odnose na potpisivanje knjigovodstvenih isprava. Usvojen je amandman koji definiše da se "Izuzetno kod povezanih pravnih lica, vođenje poslovnih knjiga, pravno lice može povjeriti ugovorom, uz određenu naknadu, drugom povezanom pravnom licu (matici) koje ima sve potrebne resurse za pravilno, kvalitetno i efikasno obavljanje tih usluga, te ima zaposlena kvalificirana lica koja su odgovorna za vođenje poslovnih knjiga i sačinjavanje finansijskih izvještaja i koja ispunjavaju i druge uslove utvrđene ovim zakonom i općim aktom pravnog lica". Također, usvojeni su i amandmani koji definišu ograničenja i broj revizora koji mora imati društvo za reviziju.

Udruženje poslodavaca insistiralo je i na ukidanju trajanja licenci za obavljanje revizije od tri godine, te je ovaj amandman prihvaćen. U cilju smanjenja procedura olakšavanja

rada revizora ukida se izdavanje licence na određeni rok od tri godine i obaveza podnošenja zahtjeva za produženje iste nakon isteka tri godine, ali se propisuje i u kojim slučajevima se može oduzeti licenca. Zakon predviđa da se licenca oduzima u slučaju grubog kršenja ugleda revizora ili revizorske kuće.



Još jedan bitan amandman UPFBiH koji je usvojen kroz Nacrt je da se za obavljenju reviziju plaća naknada koja se utvrđuje Ugovorom o reviziji a ne kako je bilo predloženo da ista ne može biti niža od tarife revizorskih usluga koje utvrđuje i donosi Komora uz saglasnost Ministarstva i koja se objavljuje u "Službenim novinama Federacije BiH". Dakle, ukinuta je obaveza donošenja tarifa od strane revizorskih komora. Na ovaj način se sprečava, ograničava ili narušava tržišne konkurencije, kao i zloupotrebe dominantnog položaja na relevantnom tržištu Federacije Bosne i Hercegovine. Udruženje je predložilo i amandman "obaveznoj reviziji iz prethodnog stava ne podliježu finansijski izvještaji i konsolidirani finansijski izvještaji pravnih lica u kojima je jedan vlasnik ukoliko to on izričito ne zahtjeva", međutim, ovaj amandman nije prihvaćen. Budući da je osnovna svrha revizije zaštita vlasnika kapitala, a potom i zaštita potencijalnih investitora, kreditora i poslovnih partnera, postavlja se pitanje da li je usvojeno rješenje u javnom interesu. Udruženje smatra da ne postoji javni interes da se vrši obavezna revizijama u kompanijama sa malim brojem vlasnika, gdje je u većini slučajeva vlasnik i direktor kompanije, sa relativno malim brojem zaposlenih i malim prometom.



UPFBiH se protivi donošenju Zakona o stečaju kojeg je predložila Vlada FBiH

Iz UPFBiH napominju da je najnoviji Prijedlog zakona o stečaju FBiH kojeg je Vlada uputila u parlamentarnu proceduru gotovo istovjetan tekstu koji su zastupnici već jednom odbili

Udruženje poslodavaca FBiH nimalo nije iznenađeno ponašanjem Vlade FBiH kada se radi o utvrđivanju Prijedloga zakona o stečaju FBiH. Kao i mnogo puta do sada Vlada je pokazala da nema poštovanja prema socijalnim partnerima niti interesa da se kroz dijalog dođe do kvalitetnih zakonskih rješenja te da donose prijedloge zakona u interesu pojedinih interesnih grupa, ne vodeći računa o općedruštvenom interesu.

Iz UPFBiH navode da je od premijera FBiH Fadila Novalića zatraženo da se prije razmatranja zakona o stečaju FBiH na sjednici Vlade o ovom prijedlogu razgovara na sjednici Ekonomsko-socijalnog vijeća za teritoriju FBiH. Premijer je tada zamolio da UPFBiH ne insistira da se ova tačka razmatra na ESV, a zauzvrat je obećao da će biti organizirane direktne konsultacije sa Federalnim ministarstvom pravde, a da Vlada FBiH neće usvajati tekst zakona i slati ga u parlamentarnu proceduru prije konsultacija. Do konsultacija nikada nije došlo. Bez konsultacija je Prijedlog zakona o stečaju utvrđen na sjednici Vlade FBiH i upućen u parlamentarnu proceduru. Na ovaj način su premijer, ali i Vlada FBiH u cjelini, pokazala neznanje, neprihvatanje prijedloga koji bi mogli kvalitetno unaprijediti ovaj zakonski tekst te da neće, ne žele i ne znaju raditi u općem interesu.

Iz UPFBiH napominju da je najnoviji Prijedlog zakona o stečaju FBiH kojeg je Vlada uputila u parlamentarnu proceduru, gotovo istovjetan tekstu koji su zastupnici Federalnog parlamenta već jednom odbili. Sasvim je izvjesno da ovaj Prijedlog zakona

neće dobiti podršku zastupnika i delegata Parlamenta FBiH ni sada. UPFBiH se apsolutno protivi njegovom donošenju u ovom tekstu, a prema informacijama kojima poslodavci raspolažu, protiv njegovog donošenja su i sindikati u FBiH.



Naglašavaju kako u Prijedlogu zakona o stečaju FBiH kojeg je nedavno usvojila Vlada FBiH ima kvalitetnih rješenja, ali da i dalje ostaju problematične činjenice da zakon ne predviđa odgovornost organa u stečajnom postupku, niti su pak predviđene sankcije za organe koji svojim činjenjem ili nečinjenjem oštete kompaniju ili FBiH. Novi prijedlog ne predviđa čak ni obavezu odgovornih osoba da pokrenu stečajni postupak kada se za to steknu svi zakonom definirani uslovi. Stoga smatraju da će predložena rješenja za tri-četiri godine opet dovesti do istih problema sa kojima se susrećemo danas, poput stečajnih postupaka koji traju godinama, stečajnih sudija koji vode po sedam ili osam stečajnih postupaka istovremeno itd.

Ističu da je Prijedlog zakona o stečaju FBiH kojeg je UPFBiH dostavilo Vladi FBiH u julu ove godine usklađen sa direktivama Europske unije koje se odnose na stečaj, harmoniziran sa zakonskim rješenjima koja su na snazi u Republici Srpskoj i Brčko distriktu BiH i puno je bolje rješenje od onoga kojeg je predložila Vlada FBiH.

„Zbog svega navedenog pozivamo poslanike i delegate u Predstavničkom i Domu naroda Parlamenta FBiH da ne prihvate Prijedlog zakona o stečaju FBiH kojeg je u parlamentarnu proceduru dostavila Vlada FBiH", naglašavaju iz UPFBiH.

UPFBiH pozvalo zastupnike ZD PFBiH da ne svoje Prijedlog zakona o stečaju po hitnom postupku

Udruženje je dostavilo svoje amandmane te predložilo zastupnicima da amandmane preuzmu kao svoje, jer će se tako znatno poboljšati tekst zakona

Udruženje poslodavaca FBiH pozvalo je zastupnike Zastupničkog doma Parlamenta FBiH da ne usvoje po hitnom postupku Prijedlog zakona o stečaju koji se nalazi na dnevnom redu 18. redovne sjednice, a koja je zakazana za 26. januar 2021. godine.

Udruženje u dopisu upućenom predsjedavajućem i svim zastupnicima ZD, napominje da je Vlada FBiH uputila tekst u identičnom obliku koji nije usvojen na 11. redovnoj sjednici ovog doma koja je održana 19. februara 2020. godine, jer je ocijenjeno da rješenja nisu dobra te da postoje brojne primjedbi na tekst. Shodno navedenom Udruženje poslodavaca u FBiH je iznenađeno činjenicom da skoro godinu dana nakon, Vlada ponovno u proceduru šalje tekst u identičnom obliku.



Vlada nije ispoštovala ni socijalne partnere. Naime, socijalni partneri su od premijera zatražili da se, prije razmatranja i usvajanja Prijedloga zakona o stečaju FBiH na sjednici Vlade FBiH o prijedlogu raspravlja na sjednici Ekonomsko-socijalnog vijeća za teritoriju FBiH. Premijer je tada zamolio

socijalne partnere da ne insistiraju da se ova tačka razmatra na ESV-u i obećao da će biti organizirane direktne konsultacije sa Federalnim ministarstvom pravde, te da Vlada FBiH neće usvajati tekst Zakona i slati ga u parlamentarnu proceduru prije konsultacija. Međutim, do konsultacija nikada nije došlo.



Udruženje upozorava da su rješenja u Prijedlogu zakona veoma loša. Pojedini članovi su preuzeti iz zakona Republike Hrvatske, ali nedostaju oni članovi koji dalje regulišu ta pitanja. Eminentni profesor Milić Simić, vodeći stručnjak u ovoj oblasti bio je predstavnik Udruženja poslodavaca FBiH u Radnoj grupi za izradu Zakona o stečaju. Međutim, nijedan njegov prijedlog nije prihvaćen.

Ipak, Prijedlog zakona sadrži i kvalitetna rješenja kojim se pokušalo urediti i popraviti stanje koje je trenutno prisutno u ovoj oblasti. Uvođenje predstečajnog postupka koji se provodi prije pokretanja i vođenja stečajnog postupka a radi finansijskog i operativnog restrukturiranja dužnika je veoma dobar pristup stečaju, ali dalje ostaju problematične činjenice jer zakon:

- ne definiše odgovornost svih učesnika u stečajnom postupku, a proklamovano je nastojanje svih stranaka i vlasti da se teži ka transparentnosti i odgovornosti vršilaca javnih dužnosti;
- ne uvodi odgovornost za učesnike stečajnog postupku ako kasne u sprovođenju

potrebnih radnji, a što će u praksi kao slabost stečajnog postupka ponovno biti njegova dužina trajanja koja s jedne strane povećava troškove stečajnog postupka, a s druge strane odugovlači namirenje povjerilaca;

- ne definiše krug lica koja u ime stečajnog dužnika mogu pokrenuti stečajni i predstečajni postupak;
- ne postoji čak ni obaveza odgovornih osoba da pokrenu stečajni postupak kada se za to steknu svi zakonom definirani uslovi, što će dovesti do novog duga željeznica, rudnika, kliničkih centara, javnih gradskih prevoznika, a koji u ovom momentu imaju akumulirani dug veći od godišnjeg budžeta FBiH;
- iako definiše maksimalan rok za okončanje stečajnog postupka, nema niti jednog člana koji bi omogućio da se zaista u praksi i desi da se stečajni postupak okonča u roku, što će za posljedicu imati ogroman broj tužbi za naknadu štete od strane stečajnih povjerioca i stečajnih dužnika;
- iako limitira broj sporova koji može voditi stečajni upravnik, ipak ne postoji ni jedna odredba koja garantuje da će se to ostvariti u praksi;
- rokovi za poduzimanje pojedinih radnji u postupku su predugi;
- ne definiše pitanje kod rokova za prodaju i unovčavanje imovine tako da unovčavanje imovine ponovno može trajati i po nekoliko godina ili čak imovina može biti ne unovčena;
- nije definisan stepen kontrole rada stečajnog upravnika;
- nisu definisani razlozi za razrješenje dužnosti stečajnog upravnika;
- predviđen je operativni i finansijski plan restruktuiranja ali je regulisan samo jedan;
- pojedini članovi definišu istu stvar u zakonu, ali ponekad ne na isti način.

Ovakva rješenja će za tri-četiri godine opet dovesti do istih problema s kojima se susrećemo danas, poput višegodišnjih stečajnih postupaka, stečajnih upravnika koji vode po sedam ili osam stečajnih postupaka istovremeno, neodgovornost lica ovlaštenih za zastupanje stečajnog dužnika, nizak stepen namirenja povjerilaca i dr.

Odnosno, do novih Aluminijskih rudnika, kliničkih centra, i slično.

Udruženje poslodavaca FBiH je u Inicijativi 20+5+6 predložilo i Zakon o stečaju u kojem su, između ostalog, riješena sva gore navedena pitanja. Inicijativu je podržao Parlament FBiH na tematskoj sjednici koja je održana u aprilu 2019. godine i zaključkom zadužio Vladu FBiH da predložene zakone pripremi i uputi u parlamentarnu proceduru. Međutim, Prijedlog zakona koji je na dnevnom redu sjednice koja je zakazana za 26.01.2021. godine ne sadrži niti jedno rješenje koje je predložilo Udruženje poslodavaca u FBiH.



Shodno navedenom UPFBiH je na bazi rješenja iz teksta koji je sastavni dio inicijative 20+5+6, pripremio amandmane na Zakon o stečaju. Više od 50 posto rješenja iz prijedloga UPFBiH

podržano je od strane Međunarodne finansijske korporacije (IFC), a pripremi su učestvovali najveći domaći stručnjaci u ovoj oblasti. Predložena rješenja su upotpunosti u skladu sa direktivama Europske unije, harmoniziran sa zakonskim rješenjima koja su na snazi u Republici Srpskoj i Brčko distriktu BiH te su po uzoru na zakone država članica EU i puno je bolje rješenje od onoga kojeg je predložila Vlada FBiH.

Udruženje je dostavilo pomenute amandmane te predložilo zastupnicima da amandmane preuzmu kao svoje, jer će se tako znatno poboljšati tekst zakona, koji će dovesti do poboljšanja trenutne situacije u praksi kada je u pitanju stečajni postupak.

Amandmane UPFBiH možete pročitati [OVDJE](#).

Usvojen prijedlog Zakona o stečaju u FBiH

Udruženje će nastaviti sa insistiranjem na izmjenama Zakona kako bi se isti poboljšao

Prijedlog zakona o stečaju, čiji je predlagač Federalna vlada, odobren je većinom glasova na online sjednici Zastupničkog doma Parlamenta Federacije Bosne i Hercegovine, održanoj 26. januara 2021. godine.



Udruženje poslodavaca je prethodno pozvalo zastupnike da ne usvoje po hitnom postupku Prijedlog zakona o stečaju koji je predložila Vlada, te dostavilo svoje amandmane. Klub SPD-a je prihvatio i uložio amandmane kako bi se čula riječ poslodavaca, te

kako bi se usvojio zakon koji će privrednicima biti koristan, izjavila je zastupnica Jasmina Zubić.

Međutim, iako je Udruženje napomenulo da je Vlada FBiH uputila tekst u identičnom obliku koji nije usvojen na 11. redovnoj sjednici ovog doma koja je održana 19. februara 2020. godine, jer je ocijenjeno da rješenja nisu dobra te da postoje brojne primjedbi na tekst, zastupnici su prihvatili postojeći prijedlog.

Udruženje će nastaviti sa insistiranjem na izmjenama Zakona kako bi se isti poboljšao.



Iz Vlade FBiH ne dostavljaju zakonske prijedloge socijalnim partnerima

Postojećim ignoriranjem dijaloga i dogovora sa socijalnim partnerima, Vlada FBiH šalje jako lošu poruku ne samo radnicima i poslodavcima, nego i svim građanima FBiH

Zbog neprihvatljivog odnosa Vlade Federacije Bosne i Hercegovine prema socijalnim partnerima iz Udruženja poslodavaca Federacije BiH obratili su se Vladi FBiH

otvorenim pismom.

Iz UPFBiH upozoravaju da ni nakon više upućenih zahtjeva nadležna tijela Vlade FBiH nisu Udruženju dostavila izvorni tekst Prijedloga zakona o stečaju FBiH, zbog čega su bili primorani tražiti dostavljanje ovog zakonskog dokumenta pozivajući se na Zakon o slobodi pristupa informacijama u FBiH.

UPFBiH je stigao dopis iz Vlade FBiH o odobrenju dostavljanja prečišćenog teksta Prijedloga zakona, koji će, nakon što UPFBiH uplati 64 KM na ime troškova umnožavanja, biti i dostavljen UPFBiH. U rješenju upućenom UPFBiH, iz Vlade FBiH se pozivaju na Uputstvo o provođenju Zakona o slobodi pristupa informacijama u FBiH iz 2001. godine, kojim je regulirano da je cijena isprinta 0,5 KM po isprintanoj stranici (osim prvih deset strana koje su besplatne).

Iz UPFBiH pitaju odgovorne u Vladi FBiH, za početak, zašto u trećoj deceniji 21. stoljeća ne dostavljaju ovakve i slične dokumente elektronskim putem? Drugo pitanje je zašto je cijena printa utvrđena Uputstvom čak šest puta veća od prosječne tržišne cijene za ovu vrstu usluga?

Također se pozivaju odgovorni u Vladi FBiH da preispitaju svoj odnos spram socijalnih partnera, jer postojećim ignoriranjem dijaloga i dogovora sa socijalnim partnerima, Vlada FBiH šalje jako lošu poruku ne samo radnicima i poslodavcima, nego i svim građanima FBiH.

Uprkos stalnim obećanjima o rasterećenju privrede i smanjenju opterećenja na rad, plaće radnika i nameti poslodavcima se samo umnožavaju. Tako je tokom mandata ove Vlade FBiH doneseno više od 60 novih ili su povećane cijene postojećih nameta za privredu.




„UPFBiH je sa sindikatima u načelu dogovorio značajno povećanje minimalne plaće u FBiH, uz uvjet da se smanje porezi i doprinosi na plaće na maksimalno 30 posto, a

reinvestiranje oslobodi plaćanja poreza na dobit. No, sve to neće biti dovoljno ukoliko se i u javnom sektoru ne krene u značajno ukidanje i smanjenje fiskalnih i parafiskalnih nameta, koji dodatno opterećuju privredu. Pogotovo u vremenu u kojem svjetska privreda, pa tako i naša, trpi ogromne posljedice pandemije COVID-19. Vlada FBiH i njen administrativni aparat do sada nisu učinili gotovo ništa kako bi se solidarizirali sa radnicima i poslodavcima u realnom sektoru. Za početak, mogli bi izmijeniti ovo Uputstvo staro 20 godina, dostavljati dokumentaciju elektronski i ukinuti plaćanje printa dokumenata po nebuloznim cijenama", naglašavaju iz UPFBiH.

UPFBiH i Ministarstvo razvoja, poduzetništva i obrta FBiH o Nacrtu zakona o poticanju razvoja malog gospodarstva

UPFBiH traži proširenje poticajnih mjera za poboljšanje konkurentnosti malog gospodarstva



Ministar razvoja, poduzetništva i obrta FBiH Amir Zukić i direktor Udruženja poslodavaca FBiH Mladen Pandurević održali su 12. januara 2021. godine sastanak na kojem je razgovarano o Nacrtu zakona o poticanju razvoja malog gospodarstva u FBiH, čiji je predlagač pomenuto ministarstvo. Sastanku su prisustvovali i savjetnici ministra Zdravko Čerović i Sead Džiho, kao i sekretar UPFBiH Mersiha Jusić i pravnica Jasmina Kurspahić.

Na sastanku je razgovarano o ranije dostavljenim primjedbama i sugestijama UPFBiH na ovaj zakon, te se tražilo dodatna pojašnjenja za pojedine članove.

Udruženje u primjedbama, između ostalog traži i dodavanje novog poglavlja u Zakon pod nazivom Procjena učinaka propisa na malo gospodarstvo - test malog i srednjeg poduzetništva (MSP TEST). Ova procjena bi obuhvatila postupak donošenja odluka o



propisima na temelju dokaza i prikupljenih relevantnih podataka, koji će poslužiti kao smjernice za odabir najboljeg rješenja za donošenje propisa ili za poduzimanje nenormativnih aktivnosti i mjera s ciljem kako bi se osigurala detaljna analiza učinka propisa na malo i srednje poduzetništvo.

Također, Udruženje traži proširenje poticajnih mjera za poboljšanje konkurentnosti malog gospodarstva koje, između ostalog, podrazumijevaju kreditiranje pod povoljnijim uslovima, davanje pomoći za pokretanje poslovanja, istraživanje i edukaciju, kao i pojednostavljenje postupaka za osnivanje, poslovanje i razvoj subjekata malog gospodarstva.

Predstavnici UPFBiH su na sastanku također ukazali na neophodnost izmjene pojedinih članova Zakona te je dogovoreno da će Ministarstvo većinu primjedbi ugraditi u tekst Zakona. Dogovoren je nastavak saradnje na izradi ovog zakona.

Primjedbe UPFBiH možete pogledati [OVDJE](#).


UPFBiH dostavilo predsjedavajućem i klubovima zastupnika ZD PFBiH amandmane na Prijedlog zakona o izmjenama i dopunama Zakona o registraciji poslovnih subjekata

Suština prijedloga UPFBiH je da umjesto suda registraciju vrši registracioni organ, odnosno Finansijsko-informatička agencija



Udruženje poslodavaca FBiH dostavilo je predsjedavajućem i klubovima zastupnika Zastupničkog doma Parlamenta FBiH amandmane na Prijedlog zakona o izmjenama i dopunama Zakona o registraciji poslovnih subjekata sa napomenom da podržava donošenje pomenutog zakona te da je prijedlogom učinjeno znatno poboljšanje i pomak u smislu pojednostavljenja procedura registracije poslovnih subjekata.

Predlagač je prihvatio veliki dio prijedloga UPFBiH. Određena rješenja koja se odnose na postupak elektronske registracije su puno bolja u odnosu na rješenja koje je u



prethodnom periodu predlagalo Udruženje poslodavaca u FBiH. Međutim, registracija je i dalje ostala na sudovima, a takvo rješenje neće dovesti do ubrzavanja procesa registracije i njegovog pojednostavljenja. Sudovi su preopterećeni i ukoliko se zadrži postojeće rješenje teško da će doći do skraćanja i olakšavanja postupka registracije.

Suština prijedloga UPFBiH je da umjesto suda registraciju vrši registracioni organ, odnosno Finansijsko-informatička agencija. Udruženje predlaže da za registraciju i vođenje Registra bude nadležna Finansijsko-informatička agencija, odnosno da se nadležnost registracije i vođenja registra privrednih subjekata sa sudova prenese na FIA-u. Na ovaj način doći će do rasterećenja sudova a postupak registracije će biti znatno skraćen, jeftiniji i efikasniji.

Također, UPFBiH smatra da je potrebno uvesti i dva nova registra uz registar privrednih subjekata. Potrebno je skratiti rokove postupanja registracionih organa kao i još jedan niz tehničkih poboljšanja zakona.

Prijedlozi UPFBiH, formulisani u formi amandmana, harmonizovani su sa Zakonom o registraciji poslovnih subjekata u RS, primijenjene su najbolje prakse zakona iz zemalja EU i zemalja okruženja, definisani u saradnji sa FIA-om, te uz pomoć eminentnih profesora i domaćih i stranih stručnjaka iz ove oblasti.

Navedeno rješenje sadržano je u setu zakona u Inicijativi 20+5+6 koje je podržao Parlament FBiH na tematskoj sjednici koja je održana u aprilu 2019. godine i zaključkom zadužio Vladu FBiH da zakone pripremi i uputi u parlamentarnu proceduru.

Prijedloge UPFBiH možete pročitati [OVDJE](#).



Potrebno usvojiti inicijative UPFBiH za poboljšanje poslovnog ambijenta

UPFBiH je s ciljem unapređenja poslovnog ambijenta pripremilo oko trideset prijedloga novih, kao i izmjena i dopuna postojećih zakonskih rješenja

Predstavnici UPFBiH Mersiha Jusić i Husein Al-Baldawi su 8.1.2021. godine održali sastanak s direktoricom Vijeća stranih investitora (FIC) Sanjom Miović i generalnim sekretarom Američke trgovačke komore u BiH (AmCham) Nedimom Hamzićem na temu "Medijska kampanja za unapređenje poslovnog ambijenta".

Održiv i ubrzan ekonomski rast, veća konkurentnost privatnog sektora i bolje poslovno okruženje su ciljevi kojima teži cjelokupno bh. društvo, što je ujedno zajednički interes ove tri organizacije koje žele preuzeti svoj dio tereta i dati doprinos u procesu poboljšanja trenutnog ekonomskog stanja u BiH i oporavka ekonomije od negativnih posljedica pandemije COVID-19.

Udruženje poslodavaca FBiH je s ciljem unapređenja poslovnog ambijenta pripremilo oko trideset prijedloga novih, kao i izmjena i dopuna postojećih zakonskih rješenja koji su podijeljeni u četiri grupe: javni prihodi, privreda, rad i zapošljavanje i zdravstvo. Na sastanku je dogovoreno da će UPFBiH, AmCham i FIC sprovesti sveobuhvatnu medijsku kampanju koja ima za cilj upoznavanje šire društvene zajednice sa prijedlozima UPFBiH, odnosno da su predložene inicijative od općeg društvenog interesa.

Istaknuta je nužnost usvajanja predloženih zakonskih rješenja s ciljem ubrzanja oporavka bosanskohercegovačke ekonomije pogođene pandemijom COVID-19.

Raiffeisen banka izrazila interesovanje za pristupanje članstvu UPFBiH

Direktor Udruženja poslodavaca FBiH Mladen Pandurević i direktor Razvoja i podrške za srednja i mala preduzeća Raiffeisen banke Edin Hrnjica održali su 15. januara 2021. godine sastanak.

Pandurević je Hrnjicu upoznao sa aktivnostima

Udruženja, koja su u posljednjem periodu najviše bazirana na insistiranju usvajanja prijedloga Udruženja za izmjene i dopune zakona kojima će se omogućiti olakšanje i poboljšanje poslovnog ambijenta, te pomoći u prevazilaženju ekonomske krize uzrokovane pandemijom Covida-19.



„Konačni cilj Udruženja poslodavaca FBiH je ojačati svoje članice, ali i cijeli privredni sektor, što je primarni uvjet da naša država, na svim nivoima organizovanosti, otpočne velikim koracima izlaziti iz postojeće krize i letargije, posebno izražene u periodu pandemije Covida-19", kazao je Pandurević.

Hrnjica je izrazio zainteresovanost za pristupanje jedne od vodećih banaka u Bosni i Hercegovini, Raiffeisen banke, članstvu Udruženja poslodavaca FBiH.



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba